

**COLLECTIVITE TERRITORIALE DE CORSE  
ASSEMBLEE DE CORSE**

**3EME SESSION EXTRAORDINAIRE POUR 2016**

**26 ET 27 MAI**

**N° 2016/E3/028**

**DUMANDA A BOCCA POSTA DA M. Petr'Antone TOMASI  
A Nome di u gruppu « CORSICA LIBERA »**

**OBJET :**     **Strategia corsa d'ufficializazione di a lingua**

Caru cunsigniere,

Ghjorni fà, eramu in Parigi ind'u quadru di u cusì dettu « gruppu di travagliu nantu à a lingua è a cultura corsa ». C'avemu purtatu a nostra pulitica linguistica cù u statutu di cuufficialità per puntellu. È quessa, cù l'eletti di a Cullettività Territoriale di Corsica attuali o quelli di a mandatura scorsa, l'avemu detta in seme aldilà di l'appartenenza à i nostri gruppi pulitichi.

L'avemu fatta, micca perchè no cridiamu chì e ministre c'avianu da annunzià a riunione di u Cunngrèssu per revisà a custituzione in stu sensu. L'avemu fatta perchè avemu a cunvizione sicura chì solu un statutu ghjuridicu forte puderà, ind'u tempu, securizà a messa in anda di una pulitica linguistica chì dia i listessi diritti à tutti. L'avemu fatta dinù perchè simu stati eletti per quessa.

Aldilà di e quistione custituzionale c'era, di modu transitoriu, a piazza per avanzà. A risposta ? pocu è nulla. Ma puru ùn c'impedisce micca di fà, da per noi, è in casa nostra.

Vinarà u ghjornu chì u raportu di forza puliticu ci parmetterà di strappà un statutu di cuufficialità di pettu à Parigi. Intantu, u periculu murtale esiste è c'impone d'ùn cundiziunà micca a nostra azione à quessa.

Cunsideremu u statutu di u 2013 cum'è a legge nostra. Quella chì c'insegna u caminu per una strategia corsa d'ufficializazione.

Lighjendulu bè ci si pare chì parechje misure pudemu cumincià à appiecalte avà in fatti di furmazione di l'agenti di e nostre amministrazione, di visibilità di a lingua ind'a sucetà, di prisenza ind'i media, di tupunimia, di nurmalizazione di l'usu, di cuuperazione forte trà a CTC, l'Università è l'industria di a lingua chì ci tocca à costruisce.

Andemuci stuzzichendu i cunfini di a legalità attuale.

O sgiò cunsigliere, sapemu per seguità a vostra azione chè vo spartite sta logica.

Oghje, ci piaciaria di sente, davanti à l'Assemblea di Corsica, u metudu di travagliu chè vo ci pudete prupone in stu sensu è di chì manera l'eletti di l'Assemblea ci pudarianu esse associati.

À ringraziavvi.